


Nòmber:

GRUPO 7



Nos Medio Ambiente

carmabi




Tarea 1: Mapa di Kòrsou

Riba e página dilanti tin un mapa di Kòrsou. Kontestá e siguiente preguntanan:

1. Skirbi na kada flecha kon yama e área di naturalesa.
2. Skirbi den kompas na banda drechi di e pintura e palabranan nort, ost, sùit i wèst
3. Na unda abo ta biba? Pinta un krus riba bo mapa.
4. Na unda bo skol ta? Pinta un rònchi riba bo mapa.
5. Kua área di naturalesa ta mas serka di bo kas? Marka esei ku un strepi di bo kas pa e área di naturalesa.
6. Na unda ta keda e mayoria di e áreanan di naturalesa na Kòrsou? Evaluá klasikal dikon bo ta kere esaki ta.

Tarea 2: Kiko bo sa kaba?

Traha un ret di palabra ku tópiko 'nos klima'. Skirbi den e ret tur ku bo sa kaba di nos klima. Pensa riba e wer di Kòrsou i tambe riba e palunan, matanan i bestianan ku bo ta haña aki ku tin ku adaptá na nos klima pa sobreviví. Purba yena por lo ménos 15 palabra. Añadí palabra na e ret durante e kòmbersashon klasikal.



Kon palu i mata por sobrebibí na Kòrsou?

Kòrsou ta un isla chikí den Laman Karibe, dilanti di kosta di Sur Amérika. Kòrsou ta situá na Hemisferio Nort, serka di e ekuator. P'esei temperaturanan aki ta hopi konstante (mas o ménos 30 grado henter aña). Awaseru no ta kai hopi, pero den temporada di awaseru awa por yobe fuerte.

E isla tin un klima di sabana. Esaki ke men ku nos tin un temporada di sekura i un temporada di awaseru. Tin diferente faktor ku ta determiná na unda mata, palu òf flor por krese: ta dependé por ehèmpel di e tipo di tera, e kantidat di solo i e kantidat di awa disponibel na e sitio. Kualkier mata mester di un sitio pa krese, airu, awa, material nutritivo i vitamina fo'i tera, i lus di solo. For di e energia ku solo ta duna nan, mata por traha tur loke nan mester pa krese. Pa logra esaki, nan mester por saka awa i nutriente for di tera ku nan rais, i hala rosea dor di nan blachinan.



Kadushi

Sierto mata òf palu ta krese solamente den bon tera, manera pal'i tamarein, miéntras otro bo ta haña solamente riba suela di kalki, manera dreifi shimaron. Kalbas di mondi i karawara mester di hopi solo pa nan krese bon, miéntras lisimbein ta preferá krese den sombra.

Na Seru Kristòf ta mas muhá ku otro kaminda na Kòrsou. P'esei einan bo ta haña mata ku no por krese bon na otro parti di Kòrsou, manera orkidia.

Na komparashon, nos káktusnan, kadushi, datu, infrou i milon di seru ta masha resistente kontra temporada di sekura.

Klima di sabana no ta masha agradabel pa mata. A pesar di esei nos tin mas ku 500 espesie di mata i palu na Kòrsou. Segun tempu a pasa nan a adaptá nan mes na solo, sekura i bientu fuerte.

Adaptashon na rais i struktura di palu

Mata ta chupa awa ku nutriente for di tera ku nan rais. Na Kòrsou tin biaha tin temporada di sekura largu pa despues awaseru por kai duru. Hopi di nos mata aki por chupa i warda hopi awa. Pa saka mas tantu awa posibel, rais di káktus ta largu i ta plama bai leu, nèt bou di superfisie di tera. Asina nan ta kubri un área mas grandi posibel, sin mester koba bai hundu.



Wayaká, un di nos matanan ku semper ta yen di blachi bèrdè, ta hasi'é nèt kontrali. E tin un rais enorme ku ta koba bai masha hundu pa e yega na awa di tera. Matanan den famia di tekú, sentebibu i pita tin hasta un otro manera pa optené awa: Nan blachinan ta forma un sírkulo pa fangu awa di awaseru i serena.

Wayaká semper ta yen di blachi bèrdè i e tin un tronkon ku deseñonan karakterístiko.

Mata sin blachi mes, mata ku ta pèrdè nan blachi, blachi ku forma speshal, i otro adaptashon pa konservá awa

Mata ta hala rosea via buraku chikitu den nan blachinan. Miéntrastantu, awa ta evaporá for di mesun burakunan. Asina un palu di wayaká por pèrdè mas o ménos 100 liter di awa pa día! P'esei no ta straño ku mata na Kòrsou tin adaptashon pa evitá esaki mas tantu posibel. Káktus ta kampion den esaki: nan a lora nan blachi asina steif ku nan a bira sumpiña.

Pal'i siya, kalbas i pal'i lele mesora ta laga kasi tur nan blachi kai ora temporada di sekura ta yega.



Shimaruku

Otro mata manera wabi, indju, divi divi, tamarein i flamboyan a kambia forma di nan blachi pa hasi e superfisie mas chikí. Asina ménos awa por evaporá. Tambe, ora ta hasi hopi kalor, nan por drai nan blachi for di solo pa nan sufri ménos di e kalor.

Orkidia blanku, barba di kadushi i lòki lòki ta lora nan blachi ora solo ta kima duru. Un otro manera pa evitá pèrdè demasiado awa den kalor ta pa forma un kapa di kabei fini riba nan blachi (manera na barba di kadushi i welensali), òf un kapa di was fini riba e blachinan, manera pal'i manzaliña, pal'i lechi i oliba.

Floria, i produkshon di fruta i simia

Den e temporada kòrtiku di awaseru ora tin sufisiente awa, hopi palu i mata mester kuminsá produsí flor, fruta i simia. Basta mata na Kòrsou ta floria vários biaha pa aña. Un ehèmpel ta e palu di shimaruku. E palu aki ta yen yen di fruta djis un ratu despues di un yobida fuerte. Na mesun manera, palu di kibrahacha ta e promé palu ku ta saka flor despues di un temporada di sekura. Despues ku el a kab'i floria i si ainda a sobra awa, e ora ei so e ta saka su blachinan nobo.

Tarea 3: Esei ta nobo

Bo a lesa e teksto riba e páginanan anterior. Un parti di dje bo tabata sa kaba, pero probablemente un parti nò. Traha un resúmen di e kosnan ku bo a siña aki bou. Skirbi e frasenan for di e teksto.

.....

.....

.....

.....

.....

.....

.....

.....

.....

Tarea 4: Bèrdat òf no bèrdat?

Bèrdat / no bèrdat	Un mata ta hala rosea dor di su blachinan i e ta muri si bo ta pon'é den un kashi sin lus.
Bèrdat / no bèrdat	Na Kòrsou ta fasil pa mata pa biba.
Bèrdat / no bèrdat	Awa no ta evaporá via e blachinan di mata.
Bèrdat / no bèrdat	Káktus ta bon adaptá pa biba akinan pasobra nan rais ta kubri un área hanchu, nan por warda awa pa hopi tempu, i tiki awa por evaporá pasó nan tin sumpiña.
Bèrdat / no bèrdat	Klima di sabana ta un klima kayente i seku, kaminda de bes en kuando awaseru ta kai.

Ora bo ta kla, buska e kontestanan den e teksto. Hala un strepi bou di e frasenan ku ta duna bo e informashon.

Bo a kontestá tur pregunta korekto? ☐ Si / ☐ nò

Tarea 5: Pinta



Kadushi



Datu

Pinta un datu i un kadushi den e hòkinan aki bou.
Studia e plachinan ariba bon promé ku bo kuminsá
pa bo wak e diferensha.



Kadushi

Datu

Kon animal por biba riba nos isla?

Meskos ku tin diferensha grandi entre e diferente mata i palunan na Kòrsou, e animalnan di nos isla tambe ta masha diferente fo'i otro. Sierto animal ta preferá lugá un tiki húmedo, otro bo ta haña mas tantu kaminda ta seku. Tur bestia mester sòru pa sufisiente kuminda pa nan sobrebibí i nan tambe mester por topa ku individuonan di mesun espesie pa nan por propagá.

Mayoria di bestia ta biba kaminda nan por haña nan kuminda. Yuana ta kome blachi, flor i fruta di mata. P'esei bo ta hañ'é den mondi será kaminda tin hopi mata. Sapu ta kome insekto i mester di awa dushi pa e pone webu. P'esei bo ta hañ'é serka di dam òf pos, i otro lugá kaminda ta keda un tiki húmedo.

Nos ta haña biná di Kòrsou solamente banda di kunuku trankil kaminda ta krese mata i yerba pa nan kome. Nan mester di un área grandi pa nan haña sufisiente kuminda, hasta den temporada seku.

Pa pelikan, makuaku i gabilan piskadó tin sufisiente kuminda. Nan ta biba na kosta pasobra den laman rònt di Kòrsou tin masha hopi piská. Benewater plat ta ideal pa flamingo pasobra ei tin hopi kabaron chikitu ku ta nan kuminda.

Rèptil



Un rèptil ta un animal ku wesu di lomba i ku mayoria biaha ta biba riba tera. Nan ta bestia sanger friu. Esaki ke men ku e temperatura di nan kurpa no ta konstante. Rèptil mester keinta su kurpa den solo pa e keda aktivo pa e por buska kuminda òf un kompañero por ehèmpel. Ora ta bira muchu kalor, nan ta buska sombra. Mamíferonan i e ser humano por regulá temperatura di nan kurpa nan mes ku ta mas o ménos 37° Celsius

Kaku

Kueru di rèptil tin skama duru i ta sinti gròf ora bo mishi kun'é. Esaki ta sòru ku nan kueru no ta seka demasiado ora nan ta drumi den solo pa keinta nan kurpa.

Ora nan ta kambia di kueru, ya kaba nan tin nan kueru nobo kla kaba ora nan sali for di nan kueru bieu. Rèptil ta pone webu. Ora e yunan sali nan ta independiente mes ora. Asina nan no mester di nan mayornan.



Yuana

Algun rèptil ku nos konosé bon ta kolebra, lagadishi, kaiman i turtuga. E sinku espesie di lagadishi mas konosí na Kòrsou ta yuana, pegapega, blòblò, kaku i lagadishi.

Mamífero

Na Kòrsou tin 10 espesie di mamífero indígena, ku ta eksistí solamente akinan. Nan ta ocho diferente espesie di raton di anochi, e biná di Kòrsou i e konènchi di Kòrsou.

A sobra solamente mas o ménos 200 biná di Kòrsou i mayoria di nan ta biba den Parke Kristòf. Den siglonan pasá, hende a trese basta grupo di mamífero na Kòrsou ku poko poko a bira salbahe. Ehèmpel di esaki ta kabritu i pushi. Kabritu shimaron ta forma un problema grandi pa futuro di flora i founa di nos isla. Nan ta rosa tur kos ku nan ta topa.

Raton di anochi ta masha importante. Manera insekto i abeha ta polonisá flor di mata, raton di anochi ta hasi esaki ku flor di káktus. Asina káktus por propagá. Tambe nan ta kome e frutanan di káktus. Ora nan ta bai af e simianan den nan pupu ta kai otro kaminda. Asina mata nobo por krese. Ademas raton di anochi ta gusta kome insekto, loke por resultá den ménos uso di pestisida kímiko kontra por ehèmpel sangura.

Tarea 6: yena e palabra korekto

- 1 Animal mester di i pa nan por haña yu.
- 2 Rèptil ta bestia sanger friu. Esaki ke men ku nan no por regulá di nan mes kurpa i nan tin ku nan ambiente.
- 3 Mamífero, meskos ku para ta i nan mes por regulá nan temperatura.
- 4 Raton di anochi ta importante pa di simia di mata: nan ta kome e i ta plama e simianan otro kaminda, pa un palu nobo por krese. Tambe nan ta kome lokual ta resultá den ménos uso di

Tarea 7: Pregunta

1 Menshoná 3 karakteristiká di un rèptil:

-
-
-

2 Kiko ta e 5 espesie di lagadishi mas komun na nos isla?

-
-
-
-
-

3 Kua ta e 2 espesie di mamífero ku bo ta haña solamente na Kòrsou?

-
-

Ki sorto animal mas ta biba aki?

Fuera di mamífero i rèptil, tin hopi espesie di piská i para ku ta biba den laira i awanan rònt Kòrsou.

Piská

Piská ta bestia ku ta biba bou di awa i ku ta hala rosea ku nan kaikai. Nan ta animal vértebra, loke ke men ku nan tin wesu di lomba. Piská tambe tin ala i skama. E alanan ta pa landa, pa generá velocidat i pa stür. Kueru di kasi tur piská ta kubrí ku skama, solamente kabai di awa, tribon i chuchu no tin skama. Bo por parti piská den tres grupo:

- piská di awa dushi: bo ta haña nan por ehèmpel den dam, roi, riu i lago;
- piská di awa brak: bo ta haña nan den pal'i mangel i den delta di riu;
- piská di awa salu: bo ta haña nan den laman.

E piská di mas slow ku tin ta e kabai di awa. Esnan mas rápido ta balau salmou di oséano Pasífiko i balau pretu. E dos piskánan aki por yega na un velocidat di mas ku 110 kilometer pa ora.

Algun espesie di piská por bula sali fo'i awa. Piská buladó por ehèmpel tin ala di pechu masha grandi ku nan por usa pa zueif riba awa pa skapa predadornan.

Tin mas ku 300 espesie di piská di ref ta biba na e refnan di koral na Kòrsou. Laman grandi tambe ta yen di piská. Aki piskadónan por fangu buní, dradu, mulá, piku i balau.

Habitat natural di piskánan rònt di nos isla ta benewater i laman. Palu di mangel den benewater ta masha importante pa piská, meskos ku koral den laman. Piská ta usa pal'i mangel i ref di koral pa pone nan webu, i nan yuchinan ta biba aki te ora nan ta sufisiente grandi pa bai laman grandi.

Mundu supmarino di Kòrsou ta hala masha hopi turista tur aña. Turista ku ta bin Kòrsou pa snòrkel òf sambuyá ta gasta hopi plaka. P'esei, ademas di proveé kuminda pa hende i otro animal, nos refnan di koral i nos mundu supmarino tambe ta proveé entrada pa hopi hende ku ta traha den turismo.

Algun ehèmpel di piská ku bo por haña rònt di nos isla ta:



Lionfish



Kabai di awa



Trompèt



Katabòli



Kleinfeshi



Grastèlchi di piedra

Para

Tur para tin dos karakterístiko importante: nan tin ala i pluma. Además nan ta bestia sanger kayente i nan ta pone webu ku un kaska duru. Mayoria para por bula, pero no tur.

Nan habitat natural ta hopi variá. Bo ta haña para riba oséano grandi, den desierto, na selva tropikal, i hasta den regionan polar.

Tambe nan forma i tamaño ta varia hopi. Abestrus i emu ta para grandi i nan no por bula, mientras ku blenchi ta chikitu i un buladó masha ábil.

Bestia sanger kayente mes ta regulá temperatura di nan kurpa. Nan por hasi esaki dor di move nan muskulonan, dor di soda, òf dor di aumentá nan halamentu di rosea. Aki bou tin ehèmpel di algun para komun na Kòrsou:



Makuaku ta mas ku un meter largu i di span nan alanan ta pasa 2 meter. Sin embargo, makuaku no ta pisa hopi i nan por zueif riba bientu fásil. Haltu den laira nan ta buska nan proi. Nan ta kome piská buladó i sekat.



Di pia te kabes flamingo ta mas o ménos 140 pa 175 sèntimeter. Bo tabata sa ku e bòlòbònchi na su pata no ta su rudia, pero su ènkel? Ku nan pik èkstraordinario nan ta sefta molusko, kabaron i bichi fo'i awa pa nan kome. Bo ta haña nan hopi den saliña.



Barika hel ta un para chikitu(11 sèntimeter) i nan parti abou ta hel remarkabel. Nan kuminda ta konsistí di nèktar di flor i fruta. Barika hel ta biba solitario, pero tin bes nan sa forma grupo grandi kaminda tin hopi kuminda.



Totolika di awa ta 20 sèntimeter largu. Bo ta wak e para aki na kosta yen di baranka, riba pir òf den dam. Semper aktivo e ta bòltu piedra i kokolishi buskando su kuminda. Su kuminda ta kosistí di kakalaka di awa, kokolishi, molusko, kabaron, piská chikitu, insekto, piská morto, mata i lima.



Di span warawara su ala ta 125 sèntimeter. Normalmente bo ta hañ'é sintá riba káktus òf skondí den mondi. Warawara ta e Selikor di mondi: nan ta komedó di bestia morto (nan no ta fangu proi bibu, pero semper ta buska bestia ku ta morto kaba).



Trupial ta entre 30 i 40 sèntimeter largu i e tin un zonido riparabel. E para aki no ta skiu i bo por mir'é regularmente. Nan ta kome insekto i fruta. Trupial no ta traha su mes nèshi. Nan ta usa nèshi bandoná di otro para, òf nan ta kore ku e habitantenan.



Pelikan ta un para grandi. E por bira 100 pa 150 sèntimeter largu. Nan ta bula baha vertikalmente den laman fo'i basta haltu pa fangu piská pa kome. Pelikan nunca ta bai leu fo'i kosta. Bo ta haña nan entre otro na kosta wèst di Merka i den área di Karibe.



Blenchi ta un para masha chikitu. E ta bira solamente 6 pa 7 sèntimeter. E ta e úniko para ku por bula bai patras. E tin un pik i lenga largu ku e ta usa pa yega na e nèktar den flor. E por yega na nèktar ku ni insekto no por yega!



Chuchubi ta 23 sèntimeter largu. Di parti ariba e ta shinishi i blanku di parti abou. E tin un strepi blanku riba su wowonan i un rabu pretu largu ku un rant blanku. Prinsipalmente nan ta kome fruta i insekto, pero si e ta haña chèns e tambe sa fangu kokolishi òf otro animal vértebra chikitu.

Tarea 8: Kiko bo ta mira?

Skirbi bou di tur plachi e nòmber di e piská òf para.



Tarea 9: Pregunta

1 Klima ta deskribí wer na un lugá partikular. Kon yama e klima di Kòrsou?

.....

2 Ki ta e karakterístikanan di e klima aki?

1.

2.

3 Kon rais di káktus ta adaptá na nos klima?

.....

4 Menshoná 4 adaptashon di palu i mata na nos isla ku ta pèmití nan pa sobreviví aki:

1.

2.

3.

4.

Tarea 10: sòm di redaksi

- 1 Anna, Roan i Walleed a partisipá den e kareda di 5 kilometer di KLM Marathon. Anna a kore 11.03 kilometer pa ora promedio. Roan a kore 11.077 kilometer pa ora promedio i Walleed 11.09 kilometer pa ora. Ken a kore mas lihé?

A: Anna B: Roan C: Walleed
- 2 Kua number ta eksaktamente mei mei di 46,3 i 46,4?

A: 46,30 B: 46,35 C: 46,355 D: 46,39
- 3 Mener de Castro ke planta palu bèrdè riba un pida tereno bashí. E ta kumpra 150 Wayakápa 10000 florin na tur. E ta paga solamente ku papel di 100 florin. Kuantu papel e mester duna?

..... papel
- 4 Kiko ta e kontesta? $369 + 258 - 147 =$
- 5 Den temporada di sekura 50 porshento di e 210 káktusnan a aplastá. Kuantu káktus ya no ta para stret mas?

..... káktus
- 6 Pa muha 6 mata mester di 240 mililiter awa. Levin tin 4 mata so. Kuantu mililiter awa Levin mester pa muha su matanan?

..... mililiter
- 7 Riba resibu di Shanti tin:
 Kuminda pa pushi: 3,75 florin
 Banchi pa kacho: 6,75 florin
 Maishi: 2,50 florin
 Kòmkòmber: 2,99 florin.

Kuantu Shanti mester paga na tur? Rònt af na florin henter.

..... florin

EKSTRA: pùzel

Bou di e pùzel tin 18 palabra relashoná ku nos isla speshal, por ehèmpel Daaibooi. Tur palabra ta skondí den e pùzel. Buska nan tur i hala un strepi dor di nan.

R	E	T	Y	I	H	S	U	D	A	K	K	V	X	F	T	B	B
D	A	T	G	L	C	B	N	B	L	E	N	C	H	I	K	W	S
D	K	G	E	W	U	O	L	B	U	O	L	B	B	C	O	E	Y
A	J	A	R	L	Y	Y	G	I	I	O	N	E	G	Í	S	K	O
F	D	N	K	I	U	S	X	P	S	M	D	Q	F	G	X	O	P
B	U	V	A	A	K	B	A	A	Ñ	I	P	M	U	S	S	X	L
C	I	B	N	N	L	U	R	N	P	M	W	X	P	O	P	O	M
N	G	W	I	B	U	A	L	A	I	J	H	U	L	A	Y	A	L
O	L	K	B	N	T	B	K	T	B	L	R	O	R	Q	M	I	M
M	H	A	P	L	Á	L	E	A	U	Y	K	A	R	Í	S	F	S
L	X	N	R	O	U	K	Q	W	A	R	N	R	F	I	P	U	K
U	R	A	A	G	K	S	D	I	G	A	A	E	M	H	P	T	G
P	H	U	I	D	I	C	R	L	N	I	R	B	I	F	Q	I	L
W	Z	Y	S	A	R	E	H	L	E	O	E	O	L	C	L	R	I
S	A	G	N	T	U	B	W	V	R	I	U	D	Q	P	Q	B	T
S	S	A	D	U	B	E	S	J	N	D	Y	X	Y	U	X	A	P
D	W	P	I	I	U	Y	A	A	R	A	W	A	R	A	W	K	È
A	E	K	I	N	I	K	I	N	I	P	Y	Y	V	Y	V	S	R

- AGRIKULTURA
- BARBULETE
- BLOUBLOU
- KABRITU
- KINIKINI
- MAMÍFERO
- PULMON
- SOLO
- WEBUNAN
- AIRE
- BINÁ
- BURIKU
- KADUSHI
- KLINA
- OKSÍGENO
- RAIS
- SUMPIÑA
- YUANA
- AWA
- BLENCHI
- DATU
- KAKALAKA
- LISIMBEIN
- PARANAN
- RÉPTIL
- WARAWARA

Lista di palabra

Komedó di bestia morto	Un komedó di bestia morto no ta fangu su mes proi. E ta buska bestia ku ta morto kaba pa kome.
Kompas	Un opheto ku ta mustra bo na unda nort, ost, sùit i wèst ta keda.
Area di naturalesa	Un área ku karakterístika notabel pa ku bestia, mata òf paisahe.
Presipitashon	Tur sorto di awa ku ta kai fo'i nubia, manera sneu òf awaseru.
Temporada di awaseru	E temporada kada aña ora hopi awa ta kai. Temporada di awaseru na Kòrsou ta di òktober te ku yanüari.
Ala di span	Hanchura di e alanan di un para ora e ta bula, midí di punta dje ala te pa e otro punta.
Temperatura	Kuantu grado tin.
Teritorio	E área, ku un bestia ta haña ta di dje i ku e ta defendé kontra otro individuonan.
Típiko	Ora algu ta masha fásil pa rekonosé, òf karakterístiko pa algu.
Vegetashon	mata i yerba bèrdè, manera den un mondi.
Kapa di was	Was ta un supstansia manera vèt. Blachi di hopi mata tin un kapa di was ku ta protehá nan pa nan no seka den solo.
Sientífiko	Hende ku ta hasi investigashon pa siña algu nobo
Ret di palabra	Aki den bo ta skirbi e palabra mas importante mei mei. Tur palabra ku ta konektá ku e palabra aki bo ta skirbi rònt di dje.
Pùzel di palabra	Un pùzel den kua bo ta buska palabra entre tur e lèternan. Ora bo ta haña e palabra bo ta hala un strepi dor di dje.
Formashon di simia	E proseso den kua mata ta traha simia pa propagá.
Mamífero	Un bestia ku ta duna lus na yu bibu. E mama ta duna e yu lechi pa e krese.